

Takornariartitsisarnermik inuussutissarsiuqarnerup aamma nunami inuussutissarsiutit siuarsarneqarnissaat pillugit Inatsisartut inatsisaata allanngortinneranik Inatsisartut inatsisaannut nr. xx.-imut yy. 2004-meersumut siunnersuut.

(Unnuisarfiliornissamut taarsigassarsisitsiniartarfittut aningaasaateqarfiup ("Unnuisa-fonden") atorunnaarsinneqarnera).

(Inuussutissarsiornermut, Nunalerinermut Suliffeqarnermullu Naalakkersuisoq)

Saqqummiussissut

Aappassaaneerineq

Naalakkersuisut Inuussutissarsiutinut Ataatsimiititaliaq "Unnuisa-fonden"ip atorunnaarsinneqarnissaa pillugu inatsisissatut siunnersuummik peqqissaartumik suliaqarsimaneranut qutsavigaat naammagisimaarlugulu maluginiarlugu Inuussutissarsiutinut Ataatsimiititalip isumaliutissiisummini tamarmiulluni siunnersuut aammalu tamatumunnga malitsigitillugu aalajangerit siunissami ullutsinnut naleqqussakkamik inuussutissarsiutinik siuarsaanerup ilusilersugaanissaanut pissutissaqalersitsisut isumaqatigisinnaammagit. Naalakkersuisut naammagisimaarlugu paasivaat Inuussutissarsiutinut Ataatsimiititaliap inuussutissarsiutinik ineriartortitsinissamut atugassarititat pitsannorsarneqarnissaannik suliaq tapersersormagu.

Inuussutissarsiutinut Ataatsimiititaliaq isumaliutissiisummini allappoq ataatsimiititaliap paasigaa ingerlatseqatigiiffimmik aningaasaliissutinik isumaqatiginninniartarfimmik siunertarineqartoq tassaasoq ukiuni siullerni ernialersugaanngitsunik niuernikkut piumasaqaatit naapertorlugit aningaasaliisarnissaq. Tamanna ilumoorpoq, ilassutitullu nalunaarutigisinnaavara tamatuma saniatigut aammattaaq siunissami takornariartitsisarnermik inuussutissarsiuqartunut TAT-mik aqqissuussinermik taaneqartartup ataani tapiissutit qularnaveeqquinerillu pissarsiarineqarsinnaasut, tassunga aammattaaq unnuisarfiit ilanngullugit.

Naalakkersuisut sinnerlugit periarfissamut tamatumunnga qujassutigaa ilaatigut Inuussutissarsiutinut Ataatsimiititaliaq ilaatigullu Aningaasaqarnermut Ataatsimiititaliaq isumasioqatigalugit inuussutissarsiutit ilusilersugaanerisa ullutsinnut naleqqussarnissaanut pilersaarutit erseqqissarsinnaagakkit. Nutaamik aqqissuussinerup ataatsimut isigalugu aammattaaq unnuisarfiit aningaasalersornissaannut tunngasut allanngortinneqarnerat kingunerissavaa. Tamatumani takornariartitsisarnermik inuussutissarsiuqartut aammalu nunami

inuussutissarsiutinik taaneqartartut akornanni tapiiffigineqarnissamut periarfissatigut annertuumik

naligiissitsineqarpoq. Tamanna inuussutissarsiutit ilusilersugaaneranni tapiissutitigut aaqqissuussinerni assigiinngitsunik pissuteqartumik equngasoorutininik annikillisaaqataassaaq aammalu inuussutissarsiuteqartunut tapiiffigeqatigiittarnerup annikinnerulerneranik nassataqassalluni, suliassatut pilersaarutini ataasiakkaani politikkikkut akuliunnertaqanngitsumik.

Naalakkersuisut periarfissaq tamanna Inuussutissarsiutinut Ataatsimiititaliamut – aammalumi Inatsisartunut – uppersaanermut atorsinnaavaat, tassalu inuussutissarsiutinik siuarsaanermi ilusissamik nutaamik peqqissaartumik suliaqarnissaq suli pineqartoq. Naalakkersuisut aaqqissuussinerup nutaap ukiualunnguit ingerlaneranni nunatsinni maani inuussutissarsiutit ineriartortinneqarnerannut pitsaasunik kinguneqarumaarnissaa qularinngilaat.

Taamatut oqaaseqarnikkut siunnersuut Inatsisartunut akuersaartumik oqaluuserisassanngorlugu ingerlatinneqarpoq.